

Text: Jean-André Stammel

# *D'Wäsch- an d'Drénkbueren am Dällchen*

*Vum Hondhaus bei den Théwesbuer*

**W**a mer an den Archive vun der Stad Lëtzebuerg a soss wullen, fanne mer e puer interessant Dokumenter iwwert d'Wäsch- an d'Drénkbueren am Pafendall.

## **De Wäschbuer beim Hondhaus**

No 1867 war de Wäschbuer beim *Hondhaus* (fréier Militär-Wäschbuer vun der preisescher Garnisoun) op fir all Leit. Iwwert dee Wäschbuer, dee beim fréiere Bistro *Hondhaus* ënnert der Eisebunnsbréck louch, ginn et an onser Literatur interessant Texter.

Den Adel Weis beschreift d'Liewe vun deemools beim Wäschbuer. D'Wäschfrae souzen an enger sougenannter *Wäschkutsch* an hu mat Seef a Bleil hantéiert. Déi Kutsch war eng hëlze Këscht, an där ee mat de Knéie souz fir se beim Baseng net naass ze kréien. Mam Bleil huet een op déi naass Wäsch geschloe fir den Dreck an d'Seef erauszekréien. D'Wäsch louch a Maandelen op enger Stousskar. Hei e puer Extraiten aus dem Adel Weis sengem Buch *Um Vaubang*:

*All Dag souzen do en etlech Wäschfraen, Beruffswäschfraen, déi d'Wäsch vu bessere Stater Leit gemaach hunn ... Ech kënn der nach e puer mam Numm nennen, seet de Jhàngi, awer dat wëllt jo haut net méi vill soen. Do war d'Kättrengs Liss, d'Fréiops Suss, d'Klosen Any a Mullengs Finn, esouwäit ech mech erënneren, elauter brav an dichteg Fraen a Meedercher vum Fëschmaart.*

*Dat war der ë Geklapps um Buer vu muerges fréi bis an de spéiden Nomëtteg! E rouegt Gespréich war jo do ganz onméiglech, si hu missen haart jäizen. ...*

*Eng ganz arem Wäschfra war d'Kuhns Kätt aus dem Pafendall. E grondéierlecht a gutthäerzegt Framësch. Et hat en zimlech groussen Trapp Kanner an e lidderege Mann. Den Hary huet nëmme stonneweis geschafft an déi puer verdengte Kraizer renglech versoff. D'Kätt huet misse fir aner Leit wäsche goen. Esou souz hatt oft um Buer a mat senger leschter Kraaft huet et stonnelaang geseeft, gebleilt, geriwwen a geschwenkt. Mat him konnte mir Bouwen de Geck net maachen, mir wousste Bescheid.*

*Wann d'Kätt nomëttes géint eng Auer véier bal net méi konnt, da koum ons Grouss mat engem Biz Kaffi an e Plättel voll Schmieren uewe bei d'Trap, déi of an de Buer gong an huet geruff: "Komm erop, Kätt, 't ass Zäit fir eppes z'iessen". An d'Kätt wousst dat an huet sech net fléiwe gelooss.*

*An zur selwechter Stonn, wéi wann s'et geroch hätten, waren dem Kätt senger Kanner, dräi, véier vun deene jéngsten do. Si hu sech bei d'Mamm op déi kleng stenge Plattform uewe bei der Trap gesat an d'Mamm huet hinnen agestach, wat s'an de Mond kruten. Do si Mäijel erofgaangen! Ons Kanner ass de Verstand bal stoe bliwwen. Mir hu gesi wat Honger an Aarmut ass ..."*

Am Pafendall wéi am Gronn - hei um Kriegelsbuer beim Stierchen - : d'Aarbecht vun de Wäschfrae war schwéier.

Betty Fischer, 1905 © Photographie de la Ville de Luxembourg



### Den Théiwesbuer lénks vun der Kierch

Den Théiwesbuer leet säin Numm vu "Matthäus" of, deem Hellegen, deem d'Kierch am Dällche geweit ass.

**1838** liese mer an engem Bréif<sup>1</sup> un den Architekt vun der Stad:

*Il convient que la fontaine de St. Mathieu au Pfaffenthal soit réparée de manière à offrir au public toute commodité pour le puisage de l'eau. Cette fontaine n'étant destinée qu'à la boisson et non au lavage, vous voudrez bien nous présenter un devis des travaux, tendant à la diriger de manière à empêcher le lavage.*

**1839** fanne mer dann och e « *Mémoire des travaux et fournitures faits par le soussigné Jean Mersch pour établir un double garde de corps près la fontaine dit Tevesbour au Pfaffenthal<sup>2</sup>* ». De Montant fir dës Aarbechte beleeft sech op 1289 florins.

Och d'Waasserdréier hu vun do aus d'Waasser mat Eemeren an d'Uewerstad geschleeft. Spéider gouf d'Waasser vum Théiwesbuer als verknascht erkläert. De 25. Oktober 1885 schreift de Police-Commissaire un de Schäfferot<sup>3</sup>:

### *D'Membere vum Sang & Klang hu virun all Prouf e puer Kréi Waasser um Théiwesbuer gezaapt.*

*Nobles & Honorables Seigneurs,*

*j'ai déjà eu l'honneur de vous entretenir plusieurs fois sur le désordre et la malpropreté qui existe à la fontaine de St. Mathieu au Pfaffenthal, en ce que les habitants vont y laver des luelles (=langes) et autres linges, dont les saletés restent dans le bassin, où d'autres habitants vont laver leurs légumes ou prendre de l'eau pour boire. Je sais que vous aviez chargé feu M. l'Architecte Henri d'examiner le projet que je vous avais soumis pour faire cesser cet inconvénient, mais des nouvelles plaintes qui m'ont été portées à ce sujet, tant de la part des Militaires que des autres habitants du Pfaffenthal m'obligent de rappeler cet objet à votre attention pour aviser à des Mesures propres à garantir la salubrité de cette eau si nécessaire aux habitants de la dite Basse-Ville.*




D'Iwwerreschter vun der "Badeanstalt" Voelker-Schumann.

**1886** kënt et zur Grënnung vun der kommerzieller Wäscherei a Fierwerei *Voelker-Schumann*, där hir Gebailechkeeten nach haut ze gesi sinn (10, Vaubansstrooss). Si huet mat Quellewaasser an ouni Chimie gewäsch. D'Wäsch gouf beim Client ofgeholl an erëm zrëckgelievert. Duschen a Buedbidde goufen och do installéiert, well déi meescht Leit jo nach deemools keng Buedzëmmer haten. 1979 huet de Betrib opgehale.

**1904** freet de "Lokal-Ausschuss zur Förderung der wirtschaftlichen Interessen der Unterstadt Pfaffenthal", "*datt de Wäschbuer iwwerdaacht a reparéiert soll ginn*".

**An den 1920er Jore** goufen déi meeschten Hauser an der Sichegaass aus Salubritéitsgrënn ofgerappt. Den Théiwes- an de Wäschbuer si stoe bliwwen. Am Fritz Weimerskirch (1895-1971) sengem Lidd, "d'Lidd vum Théiwesbuer", gëtt d'Politik vun deemools ugeprangert. An de 50-er Jore gouf weider sanéiert an duerch d'Explosioun den 30. Mee 1976 ass de leschten ale Kär vum Dällche verschwonnen.

Sosthène Weis, L'Alzette près des tours de Vauban (1933).





Nodeems an den 20er Joren d'Haiser laanscht d'Uelzecht wéinst Insalubritéit hu missen ofgerappt ginn, waren d'Leit gezwongen, a Roulotten ze liewen.

*Op d'Käerche baue mir en Daach,  
Eng Roulotte huet säi Charme...*



Fotograf onbekannt © Photothèque de la Ville de Luxembourg

### D'Lidd vum Théiwesbuer

D'Madammen aus der Sichgaass  
Déi stoung vrun der Dir.  
Haut gouf et iescht, verbäi de Spaass,  
Si rieden hin an hir  
D'Regierung hat en Här geschéckt  
Ze kafen Haus fir Haus  
An dat wor deem wéi't schéngt gegléckt  
Si mussen all eraus

D'Gréit jäitzt: Mir halen net méi stall  
Mat Dreeë geet et duer  
Weist dee sech nach am Pafendall  
Da fléit en an de Buer  
Ah non! seet d'Siss, mir plénneren  
An d'Lougaass trotz dem Knascht  
Sollt do en Hond ons hënneren  
Hu mir och gudde Kascht

Mais d'Stole Broscht seet: Hieft Verstand  
Mir street kee Sand an d'Aen  
Och d'Lougaass hält net laang méi stand  
Wéist dir dann wat mir man  
Op d'Käerche baue mir en Daach  
Eng Roulotte huet säi Charme  
Déi setze mir ee schéinen Dag  
Flang mëtten op d'Plës'daarm

#### Refrain:

Kanner o Kanner o quel malheur,  
Mir mussen aus der "Rue des Fleurs"  
Wéi ass dat mënscheméiglech nur  
Mir musse fort vum „Théiwesbuer“


*Text: Fritz Weimerskirch (1895-1971)  
Musek : no enger aler Melodie*



© Photothèque de la Ville de Luxembourg

Déi modern Versioun vum Lidd:  
Kanner o Kanner o quel bonheur!  
Mir hunn elo en Ascenseur!

De Reglement vun 1935.



Reproduction: Via Fischbach © Archives de la Ville de Luxembourg

**1931** fënnt een an engem « Rapport sur les lavoirs publics<sup>5</sup> » eng ganz Rei aner Wäschbueren erimmt: een op der Muerbels, ee bei der Eecherpuert, ee bei der Waasserpompel-Statioun (nach haut ze gesinn ënnen am Gruef bei der Eecherpuert) an een um Sichenhaff vis-à-vis vun der Kapell, an deem den 12. Juli 1885 dat 27 Méint aalt Kand vum Wiert Jakob A. erdrong ass.

Iwwert de Wäschbuer am Pafendall steet an deem Rapport: « *lavoir, Pfaffenthal près du pont: on pourrait prévoir la reconstruction avec agrandissement de ce lavoir lors du redressement du chemin dit "Descherwee" et de l'aménagement de la rue des Bons-Malades* ». De Steen mat der Joreszuel 1931, dee beim Ofrappe vun der Dalle vum Wäschbuer fonnt gouf, an erëm agemauert ginn ass, géif dann op déi Zäit hiweisen.

**1935** gëtt et e Reglement iwwert d'Benotzung vum Wäschbuer vun der Vauban Reiderkasär nobäi. Dee wor haaptsächlech bestëmmt fir déi Leit, déi do gewunnt hunn. Den Artikel 6 ass interessant, gëtt en dach dat erëm, wat déi Zäit nawell gären e Problem wor.

**1967** schreift de Stater Buergermeeschter Paul Wilwertz un den Deputéierte René Hengel wéinst dem schlechten Ënnerhalt vum Wäschbuer<sup>6</sup>:

...

*Après avoir soumis la plainte au service compétent, je suis en mesure de vous fournir les renseignements suivants: Depuis presque 2 ans, un ouvrier communal est chargé de la surveillance de ce lavoir. Mais en présence de l'indiscipline et du vandalisme, il est pratiquement impossible de veiller au bon ordre.*

...

*Étant donné que le lavoir en question est peu fréquenté et sera probablement délaissé dans un proche avenir, et qu'au surplus il y a un deuxième lavoir à une distance de 100 m environ, aux abords de la rue L. Menager, les frais de surveillance et d'entretien ne semblent plus justifiables. Voilà pourquoi le collège échevinal propose-t-il aux habitants intéressés de profiter uniquement le lavoir de la rue Menager. La ville ferait alors murer toutes les ouvertures du premier lavoir, et seulement la terrasse en serait conservée.*

Vue vum Kneippbad bei der Uelzecht op den Théiwesbuer niewent der Kierch.



© Simone Beck

De Wäschbuer am Pafendall huet du bal 50 Joer weider vegetéiert a wor e Schandfleck vis-à-vis vun der Kierch, well d'Bëtongsdalle gesprongen an d'Gelänner uerg verrascht a geféierlech wor.

Et wor dem Sekretär vum Interesseveräin Pafendall-Sichenhaff, Matthias Schmidt, seng Iddi fir hei eppes Neits entstoen ze loossen an zesumme mat der Stad Lëtzebuerg gouf dunn d'Plaz an hirer heiteger Form entwéckelt a gebaut. Haut glënnert de Buer erëm a bidd den Awunner eng flott zentral Plaz fir sech e.a. ze begéinen a sech auszetauschen.

Bis wäit an d'siechzeger an esouguer an d'siwwenzeger Jore goufe Wäschbueren nach genotzt, ier d'Wäschmaschine se definitiv ofgeléist hunn. Wann et se schonn um Enn vum 19. Jorhonnert ginn hätt, wier dëse Kommentar aus der Beamten- a Biergerzeitung vum 16. Dezember 1899 net noutwenneg gewiescht:

*Chronik aus Hollerich. Frauen-Emanzipation. Daß unsere Ortschaft im Fortschritt begriffen ist und von mancher Großstadt beneidet werden kann, davon konnte man sich letzthin um neun Uhr Abends auf unserem Waschbrunnen überzeugen. Es saß nämlich daselbst ein guter Familienvater und wusch die Wäsche seiner Lieben, daß es eine Art hatte, und daß man glauben mußte, unser Misch hätte das Handwerk bei den Wäscherinnen auf den Siebenbrunnen erlernt. Unter dessen war seine bessere Hälfte zu Hause in der Wirtsstube allwo sie ihres Amtes mit Würde walte. Ob dieser Pantoffelheld noch Nachahmer finden wird, ist jedoch sehr zu bezweifeln und auch sicher nicht zu bedauern.*

#### Sources

Adel Weis, Um Vaubang, Aalstater Geschichten, Verlag De Frëndeskreess, 1970, S. 22-24

Archives VdL : Archives de la Ville de Luxembourg

Articles presse : Bibliothèque nationale

Photos : Batty Fischer (Photothèque de la Ville de Luxembourg), Simone Beck, Vic Fischbach, Jean-André Stammel, Roger Medernach

Aquarelle : Sosthène Weis, Les 2 Musées de la Ville de Luxembourg (Collections Villa Vauban)

- 1 Archives VdL LU 11 II 651
- 2 Archives VdL LU 11 II 651
- 3 Archives VdL LU 11 IV/1 210
- 4 Archives VdL LU 11 IV/2\_1925
- 5 Archives VdL LU 11 IV/3\_337
- 6 Archives VdL LU 13.2.1\_fol. 11

#### Jean-André Stammel

Secrétaire f.f. du  
Syndicat d'Intérêts  
Locaux Pfaffenthal-  
Siechenhof a.s.b.l.